



弄狗仔散步

下晡小可仔烏陰烏陰閣無日頭，想欲牽這兩隻一烏一白的狗豚仔來去『綠色公園』罔行罔散步。對狗仔罔掠來飼到今，猶毋捌予個去外口看一下仔這個鬧熱的世間是咧要啥物齣頭、變啥齣。緊早慢著去做的代誌，趁這個流擺，弄出來適應嘛是正板的。

額頸仔箍恰縛狗仔的索仔是軟軟的尼龍布拗雙沿去車的帶仔，應該是誠勇，料袂到個這兩隻狗仔攏無慣勢坐跼車內，著愛那拖那喝才硬共拐入去。盍會知影落車的時陣煞顛倒反，佇車內伸一下勾一下，欲敢若毋，姑不將就硬共踢出去。繼落去，看著遐爾仔濟的車咧來來去去，兩隻攏驚甲拑佇輪仔邊毋敢振動。我共阮某講規氣用抱的，自按呢那行那閃車過大路，才共個放落來。

人來公園了後，我牽的彼隻烏狗耳仔匱匱，尾溜揜佇尻川後，身軀半跼閣毋敢開步咧行。彼種膽膽驚驚的款勢，真正是無大無才。行都無幾步，看伊欲死盪幌閣沿路驚惶沿路拖沙的跛步，真正看袂落去，就共摸來涼亭仔較的石椅仔邊，坐落來看規遍青翠閣鬧熱滾滾的草埔。想袂到伊煞拑佇我的大腿邊，身軀必必掣。佇家己的園仔內吠甲嚇嚇叫的架勢攏毋知走去佢，仙都想無盍會差遐濟咧！

顛倒阮某牽的彼隻白狗就無全矣，耳仔倚直，尾溜躡懸直透搖，目睭溜溜瞅瞅，是彼款好玄的架勢。對四箍圍仔的人攏毋敢有歹意，嘛無吠甲半聲出來嚇驚人，恰佇厝裡比起來嘛猶差一槓。

轉來到厝，我共個這兩隻狗豚仔差天恰地的代誌講予後生知。後生聽煞，才講伊捌弄彼隻白的去「綠色公園」兩改過，連這擺總算是三改矣，較加伊嘛行路有風、心情樂暢。毋過，後生閣共我偷講白狗仔頭一改去的時陣，驚甲滲尿閣兼痾屎，害伊見笑甲面攏紅起來，緊猛抱去水道頭的下較洗尻川斗，代誌才煞去。若按呢來比並，烏狗是揜尾溜、肉會掣爾，猶無白的遐現世。

作者：藍春瑞

☆詞彙學習☆

- | | |
|-------------------------------|-------------------------------------|
| 【狗豚仔】káu-thûn-á：即將發育成熟的狗。 | 【必必掣】phih-phih-tshuah：發抖。 |
| 【流擺】lâu-pái：特殊的時刻。 | 【盍會】khah-ê：怎麼會。 |
| 【正板】tsiann-pán：正確的；正規的。 | 【溜溜瞅瞅】liu-liu-tshiu-tshiu：形容眼睛轉動靈活。 |
| 【車的】tshia--ê：縫紉機所車的線。 | 【一槓】tsit kuéh：一截。 |
| 【欲敢若毋】beh ká-ná m̄：想要又好像不要。 | 【滲尿】siàm-jiō：小便失禁。 |
| 【膽膽】tám-tám：畏懼；膽怯。 | 【痾屎】tshuah-sái：大便失禁。 |
| 【無大無才】bô-tâi-bô-tsâi：不穩重；不正經。 | 【水道頭】tsuí-tō-thâu：水龍頭。 |
| 【欲死盪幌】beh-sí-tōng-hàinn：要死不活。 | 【現世】hiân-sì：丟人現眼。 |
| 【拑】khînn：緊緊靠著。 | |